

傷寒論

冊四

傷寒論十卷目錄

卷之一

辨脈法

平脈法

卷之二

傷寒例

辨痙濕暍脈證

辨太陽病脈證并治上

卷之三

辨太陽病脈證并治中

卷之四

辨太陽病脈證并治下

卷之五

辨陽明病脈證并治

辨少陽病脈證并治

卷之六

辨太陰病脈證并治

辨少陰病脈證并治

辨厥陰病脈證并治

卷之七

辨霍亂病脈證并治

辨陰陽易差病脈證并治

辨不可發汗病脈證并治

辨可發汗病脈證并治

卷之八

辨發汗後病脈證并治

辨不可吐

辨可吐

卷之九

辨不可下病脈證并治

辨可下病脈證并治

卷之十

辨發汗吐下後病脈證并治

傷寒論目錄

傷寒論藥方目錄

卷第一

無方

卷第二

方六道

桂枝湯

桂枝二越婢一湯

甘草乾薑湯

芍藥甘草湯

調胃承氣湯

四逆湯

卷第三

方二十七道

葛根湯

葛根黃芩黃連湯

麻黃湯

大青龍湯

小青龍湯

乾薑附子湯

麻黃杏仁甘草石膏湯

桂枝甘草湯

茯苓桂枝甘草大棗湯

厚朴生薑半夏甘草人參湯

茯苓桂枝白朮甘草湯

芍藥甘草附子湯

茯苓四逆湯

五苓散

茯苓甘草湯

梔子豉湯

梔子厚朴湯

梔子乾薑湯

小柴胡湯

小建中湯

大柴胡湯

桃核承氣湯

柴胡加龍骨牡蠣湯

救逆湯

桂枝甘草龍骨牡蠣湯

抵當湯

抵當丸

卷第四

方一十九道

大陷胸丸

大陷胸湯

小陷胸湯

文蛤散

白散

柴胡桂枝乾薑湯

半夏瀉心湯

十棗湯

大黃黃連瀉心湯

赤石脂禹餘糧湯



旋伏代赭石湯

桂枝人參湯

瓜蒂散

黃芩湯

黃連湯

桂枝附子湯

甘草附子湯

白虎湯

炙甘草湯

卷第五

方十道

大承氣湯

小承氣湯

猪苓湯

蜜煎導方

猪膽汁方

茵陳蒿湯

吳茱萸湯

麻仁丸

梔子蘘皮湯

麻黃連軹赤小豆湯

卷第六

方二十道

麻黃附子細辛湯

麻黃附子甘草湯

黃連阿膠湯

附子湯

桃花湯

豬膚湯

甘草湯

桔梗湯

苦酒湯

半夏散及湯

白通湯

白通加豬膽汁湯

真武湯

通脈四逆湯

四逆散

烏梅丸

當歸四逆湯

麻黃升麻湯

乾薑黃芩黃連人參湯

白頭翁湯

卷第七

方五道

理中丸

理中湯附

燒裨散

枳實梔子湯

牡蠣澤瀉散

竹葉石膏湯

卷第八

無方

卷第九

無方

卷第十

無方

此下二十五方雖於隨證下有之緣多以加減爲文似未詳備故復載方在末卷

桂枝加葛根湯

桂枝加厚朴杏子湯

桂枝加附子湯 尤附湯附

桂枝去芍藥湯

桂枝去芍藥加附子湯

桂枝麻黃各半湯

桂枝二麻黃一湯

傷

寒

論

藥方目錄

五 中華書局聚

白虎加人參湯

桂枝去桂加茯苓白朮湯

葛根加半夏湯

桂枝加芍藥生薑人參新加湯

梔子甘草豉湯

梔子生薑豉湯

柴胡加芒硝湯

桂枝加桂湯

柴胡桂枝湯

附子瀉心湯

生薑瀉心湯

甘草瀉心湯

黃芩加半夏生薑湯

桂枝加大黃湯

桂枝加芍藥湯

四逆加吳茱萸生薑湯

四逆加人參湯

四逆加豬膽汁湯

已上十卷內計方一百一十二道

此經方劑並按古法鎔銖分兩與今不同謂如咬咀者卽今之剉如麻豆大是也云一升者卽今之大白盞也云銖者六銖爲一分卽二錢半也二十四銖爲一兩也云三兩者卽今之一兩云二兩卽今之六錢半也料例大者只合三分之一足矣

傷寒論藥方目錄

珍做宋版印



註解傷寒論卷第六

漢張仲景著

晉王叔和撰次

宋成無已註

明汪濟川校正

辨太陰脈證并治第十

太陰之爲病腹滿而吐食不下自利益甚時腹自痛若下之必胸下結鞭

太陰爲病陽邪傳裏也太陰之脈布胃中邪氣壅而爲腹滿上不得降者嘔吐而食不下下不得升者自利益甚時腹自痛陰塞在內而爲腹痛者則爲常痛此陽邪干裏雖痛而亦不常痛但時時腹自痛也若下之則陰邪留於胸下爲結鞭經曰病發於陰而反下之因作痞

太陰中風四肢煩疼陽微陰澁而長者爲欲愈

太陰脾也主營四末太陰中風四肢煩疼者風淫末疾也表邪少則微裏尋和則澁而長長者陽也陰病見陽脈則生以陰得陽則解故云欲愈

太陰病欲解時從亥至丑上

脾爲陰土王於丑亥子向陽故云解時

太陰病脈浮者可發汗宜桂枝湯

經曰浮爲在表沉爲在裏太陰病脈浮者邪在經也故當汗散之

自利不渴者屬太陰以其藏有寒故也當溫之宜服四逆輩

自利而渴者屬少陰爲寒在下焦自利不渴者屬太陰爲寒在中焦與四逆等湯以溫其藏

傷寒脈浮而緩手足自溫者繫在太陰太陰當發身

黃若小便自利者不能發黃至七八日雖暴煩下利日十餘行必自止以脾家實腐穢當去故也

太陰病至七八日大便鞮者爲太陰入府傳於陽明也今至七八日暴煩下利十餘行者脾家實腐穢去也下利煩燥者死此以脾氣和逐邪下泄故雖暴煩下利日十餘行而利必自止

本太陽病醫反下之因而腹滿時痛者屬太陰也桂枝加芍藥湯主之

表邪未罷醫下之邪因乘虛傳於太陰裏氣不和故腹滿時痛與桂枝湯以解表加芍藥以和裏太實痛者桂枝加大黃湯主之

大實大滿自可除下之故加大黃以下大實

太陰爲病脈弱其人續自便利設當行大黃芍藥者

宜減之以其人胃氣弱易動故也

腹滿痛者太陰病也脈弱其人續自便利則邪雖在裏未成大實欲與大黃芍藥攻滿痛者宜少與之以胃氣尙弱易爲動利也

辨少陰病脈證并治第十一

少陰之爲病脈微細但欲寐也

少陰爲病脈微細爲邪氣傳裏深也衛氣行於陽則寤行於陰則寐邪傳少陰則氣行於陰而不行於陽故但欲寐

少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

欲吐不吐心煩者表邪傳裏也若腹滿痛則屬太陰此但欲寐則知屬少陰五六日邪傳少陰之時自利不渴者寒在中焦屬太陰此自利而渴爲寒在下焦屬少陰腎虛水燥渴欲引水自救下焦虛寒不能制水小便色白也經曰下利欲飲水者以有熱故也此下利雖渴然以小便色白明非裏熱不可不察

病人脈陰陽俱緊反汗出者亡陽也此屬少陰法當咽痛而復吐利

脈陰陽俱緊爲少陰傷寒法當無汗反汗出者陽虛不固也故云亡陽以無陽陰獨是屬少陰內經曰邪客少陰之絡令人噤痛不可內食少陰寒甚是當咽痛而復吐利

少陰病欬而下利讖語者被火氣劫故也小便必難以強責少陰汗也

欬而下利裏寒而亡津液也反以火劫強責少陰汗者津液內竭加火氣煩之故讖語小便難也

少陰病脈細沉數病為在裏不可發汗

少陰病始得之反發熱脈沉者為邪在經可與麻黃附子細辛湯發汗此少陰病脈細沉數為病在裏故不可發汗

少陰病脈微不可發汗亡陽故也陽已虛尺脈弱瀋者復不可下之

脈微為亡陽表虛不可發汗脈弱瀋為亡陽裏虛復不可下

少陰病脈緊至七八日自下利脈暴微手足反溫脈

緊反去者爲欲解也雖煩下利必自愈

少陰病脈緊者寒甚也至七八日傳經盡欲解之時自下利脈暴微者寒氣得泄也若陰寒勝正陽虛而泄者則手足厥而脈緊不去今手足反溫脈緊反去知陽氣復寒氣去故爲欲解下利煩燥者逆此正勝邪微雖煩下利必自止

少陰病下利若利自止惡寒而蹇臥手足溫者可治  
少陰病下利惡寒蹇臥寒極而陰勝也利自止手足溫者裏和陽氣得復故爲可治

少陰病惡寒而蹇時自煩欲去衣被者可治

惡寒而蹇陰寒甚也時時自煩欲去衣被爲陽氣得復故云可治

少陰中風脈陽微陰浮者爲欲愈

少陰中風陽脈當浮而陽脈微者表邪緩也陰脈當沉而陰脈浮者裏氣和也陽中有陰陰中有陽陰陽調和故爲欲愈

少陰病欲解時從子至寅上

陽生於子子爲一陽丑爲二陽寅爲三陽少陰解於此者陰得陽則解也

少陰病吐利手足不逆冷反發熱者不死脈不至者灸少陰七壯

經曰少陰病吐利躁煩四逆者死吐利手足不厥冷者則陽氣不衰雖反發熱不死脈不至者吐利暴虛也灸少陰七壯以通其脈

少陰病八九日一身手足盡熱者以熱在膀胱必便血也



膀胱太陽也少陰太陽爲表裏少陰病至八九日  
寒邪變熱復傳太陽太陽爲諸陽主氣熱在太陽  
故一身手足盡熱太陽經多血少氣爲熱所乘則  
血散下行必便血也

少陰病但厥無汗而強發之必動其血未知從何道  
出或從口鼻或從目出是名下厥上竭爲難治

但厥無汗熱行於裏也而強發汗虛其經絡熱乘  
經虛迫血妄行從虛而出或從口鼻或從目出諸  
厥者皆屬於下但厥爲下厥血亡於上爲上竭傷  
氣損血邪甚正虛故爲難治

少陰病惡寒身踈而利手足逆冷者不治

針經曰多熱者易已多寒者難已此內外寒極純  
陰無陽故云不治

少陰病吐利躁煩四逆者死

吐利者寒甚於裏四逆者寒甚於表躁煩則陽氣欲絕是知死矣

少陰病下利止而頭眩時時自冒者死

下利止則水穀竭眩冒則陽氣脫故死

少陰病四逆惡寒而身踈脈不至不煩而躁者死

四逆惡寒而身踈則寒甚脈不至則真氣絕煩熱也躁亂也若憤躁之躁從煩至躁爲熱來有漸則猶可不煩而躁是氣欲脫而爭也譬猶燈將滅而暴明其能久乎

少陰病六七日息高者死

腎爲生氣之源呼吸之門少陰病六七日不愈而息高者生氣斷絕也

少陰病脈微細沉但欲臥汗出不煩自欲吐至五六日自利復煩躁不得臥寐者死

陰氣方盛至五六日傳經盡陽氣得復則愈反更自利煩躁不得臥寐則正氣弱陽不能復病勝藏故死

少陰病始得之反發熱脈沉者麻黃附子細辛湯主之

少陰病當無熱惡寒反發熱者邪在表也雖脈沉以始得則邪氣未深亦當溫劑發汗以散之

麻黃附子細辛湯方

麻黃

二兩去節甘熱

細辛

二兩辛熱

附子

一枚炮去皮破八片辛熱

內經曰寒淫於內治以甘熱佐以苦辛以辛潤之

麻黃之甘以解少陰之寒細辛附子之辛以溫少

陰之經

右三味以水一斗先煮麻黃減二升去上沫內藥煮取三升去滓溫服一升日三服

少陰病得之二三日麻黃附子甘草湯微發汗以二三日無裏證故微發汗也

二三日邪未深也既無吐利厥逆諸裏證則可與與麻黃附子甘草湯微汗以散之

麻黃附子甘草湯方

麻黃二兩去節

甘草二兩炙

附子一枚炮去皮

麻黃甘草之甘以散表寒附子之辛以溫寒氣

右三味以水七升先煮麻黃一兩沸去上沫內諸藥煮取三升去滓溫服一升日三服

少陰病得之二三日以上心中煩不得臥黃連阿膠

湯主之

脈經曰風傷陽寒傷陰少陰受病則得之於寒二  
三日已上寒極變熱之時熱煩於內心中煩不得  
臥也與黃連阿膠湯扶陰散熱

黃連阿膠湯方

黃連

四兩  
苦寒

黃芩

一兩  
苦寒

芍藥

二兩  
酸平

鷄子黃

二枚  
甘溫

阿膠

三兩  
甘溫

陽有餘以苦除之黃芩黃連之苦以除熱陰不足  
以甘補之鷄子黃阿膠之甘以補血酸收也泄也芍  
藥之酸收陰氣而泄邪熱

右五味以水五升先煮三物取二升去滓內膠烱盡  
小冷內鷄子黃攪令相得溫服七合日三服  
少陰病得之一二日口中和其背惡寒者當灸之附

子湯主之

少陰客熱則口燥舌乾而渴口中和者不苦不燥是無熱也背為陽背惡寒者陽氣弱陰氣勝也經曰無熱惡寒者發於陰也灸之助陽消陰與附子湯溫經散寒

附子湯方

附子

二枚破八片去皮辛熱

茯苓

三兩平

人參

二兩溫

白朮

四兩溫

芍藥

三兩平

辛以散之附子之辛以散寒甘以緩之茯苓人參白朮之甘以補陽酸以收之芍藥之酸以扶陰所以然者偏陰偏陽則為病火欲實水當平之不欲偏勝也

右五味以水八升煮取三升去滓溫服一升日三服

少陰病身體痛手足寒骨節痛脈沉者附子湯主之  
少陰腎水而主骨節身體疼痛支冷脈沉者寒成  
於陰也身疼骨痛苦脈浮手足熱則可發汗此手  
足寒脈沉故當與附子湯溫經

少陰病下利便膿血者桃花湯主之

陽病下利便膿血者協熱也少陰病下利便膿血  
者下焦不約而裏寒也與桃花湯固下散寒

### 桃花湯方

赤石脂

一斤

半斤

篩末

全用

乾薑

一斤

兩

粳米

一斤

瀋可去脫赤石脂之瀋以固腸胃辛以散之乾薑

之辛以散裏寒粳米之甘以補正氣

右三味以水七升煮米令熟去滓溫服七合內赤石

脂末方寸匕日三服若一服愈餘勿服

少陰病二三日至四五日腹滿小便不利下利不止  
便膿血者桃花湯主之

二三日以至四五日寒邪入裏深也腹痛者裏寒  
也小便不利者水穀不別也下利不止便膿血者  
腸胃虛弱下焦不固也與桃花湯固腸止利也

少陰病下痢便膿血者可刺

下焦血氣留聚腐化則爲膿血刺之以利下焦宣  
通血氣

少陰病吐利手足厥冷煩躁欲死者吳茱萸湯主之  
吐利手足厥冷則陰寒氣甚煩躁欲死者陽氣內  
爭與吳茱萸湯助陽散寒

少陰病下痢咽痛胸滿心煩者猪膚湯主之



少陰之脈從腎上貫肝膈入肺中則循喉嚨其支別者從肺出絡心注胸中邪自陽經傳於少陰陰虛客熱下利咽痛胸滿心煩也與猪膚湯調陰散熱

### 猪膚湯方

猪膚甘一斤寒

猪水畜也其氣先入腎少陰客熱是以猪膚解之加白蜜以潤燥除煩白粉以益氣斷利

右一味以水一斗煮取五升去滓加白蜜一升白粉五合熬香和相得温分六服

少陰病二三日咽痛者可與甘草湯不差者與桔梗湯

陽邪傳於少陰邪熱爲咽痛服甘草湯則差若寒

熱相搏為咽痛者服甘草湯若不差與桔梗湯以和少陰之氣

甘草湯方

甘草 二兩

右一味以水三升煮取一升半去滓溫服七合日二服

桔梗湯方

桔梗 甘一兩微溫辛

甘草 甘二兩平

桔梗辛溫以散寒甘草味甘平以除熱甘梗相合以調寒熱

右二味以水三升煮取一升去滓分溫再服

少陰病咽中傷生瘡不能言語聲不出者苦酒湯主之

熱傷於絡則經絡乾燥使咽中傷生瘡不能言語  
聲不出者與苦酒湯以解絡熱愈咽瘡

### 苦酒湯方

半夏

洗破如棗核大  
十四枚辛温

鷄子

一枚去黃內上苦酒  
著鷄子殼中甘微寒

辛以散之半夏之辛以發聲音甘以緩之鷄子之  
甘以緩咽痛酸以收之苦酒之酸以斂咽瘡

右二味內半夏著苦酒中以鷄子殼置刀環中安火  
上令三沸去滓少少含嚥之不差更作三劑  
少陰病咽中痛半夏散及湯主之

甘草湯主少陰客熱咽痛桔梗湯主少陰寒熱相  
搏咽痛半夏散及湯主少陰客寒咽痛也

### 半夏散及湯方

半夏洗辛

桂枝去皮辛熱

甘草炙甘平以各等分

內經曰寒淫所勝平以辛熱佐以甘苦半夏桂枝之辛以散經寒甘草之甘以緩正氣

已上三味各別搗篩已合治之白飲和服方寸匕日三服若不能散服者以水一升煎七沸內散兩方寸匕更煎三沸下火令小冷少少嚥之

少陰病下利白通湯主之

少陰主水少陰客寒不能制水故自利也白通湯溫裏散寒

白通湯方

葱白四莖辛溫乾薑一兩辛熱附子一枚生用去皮破八片辛熱

內經曰腎苦燥急食辛以潤之葱白之辛以通陽氣薑附之辛以散陰寒

右三味以水三升煮取一升去滓分温再服  
少陰病下利脈微者與白通湯利不止厥逆無脈乾  
嘔煩者白通加猪膽汁湯主之服湯脈暴出者死微  
續者生

少陰病下利脈微爲寒極陰勝與白通湯復陽散  
寒服湯利不止厥逆無脈乾嘔煩者寒氣大甚內  
爲格拒陽氣逆亂也與白通湯加猪膽汁湯以和  
之內經曰逆而從之從而逆之又曰逆者正治從  
者反治此之謂也服湯脈暴出者正氣因發泄而  
脫也故死脈微續者陽氣漸復也故生

百通加猪膽汁方

葱白 四莖 乾薑 一兩 附子 一枚生去皮破八片

人尿 五合 猪膽汁 一合

內經曰若調寒熱之逆冷熱必行則熱物冷服下  
噎之後冷體既消熱性便發由是病氣隨愈嘔噦  
皆除情且不違而致大益此和人尿猪膽汁鹹苦  
寒物於白通湯熱劑中要其氣相復則可以去格  
拒之寒也

已上三味以水三升煮取一升去滓內膽汁人尿和  
令相得分溫再服若無膽亦可用

少陰病二三日不已至四五日腹痛小便不利四肢  
沉重疼痛自下利者此爲有水氣其人或欬或小便  
利或下利或嘔者真武湯主之

少陰病二三日則邪氣猶淺至四五日邪氣已深  
腎主水腎病不能制水水飲停爲水氣腹痛者寒  
濕內甚也四肢沉重疼痛寒濕外甚也小便不利

自下利者濕勝而水穀不別也內經曰濕勝則濡泄與真武湯益陽氣散寒濕

真武湯方

茯苓 三兩 甘平

芍藥 三兩 酸平

生薑 三兩 辛溫 切

白朮 二兩 甘溫

附子 一枚 炮辛熱 破八片 去皮

脾惡濕甘先入脾茯苓白朮之甘以益脾逐水寒淫所勝平以辛熱濕淫所勝佐以酸平附子芍藥生薑之酸辛以溫經散濕  
右五味以水八升煮取三升去滓溫服七合日三服後加減法

若欬者加五味半升細辛乾薑各一兩

氣逆欬者五味子之酸以收逆氣水寒相搏則欬細辛乾薑之辛以散水寒

若小便利者去茯苓

小便利則無伏水故去茯苓

若下利者去芍藥加乾薑二兩

芍藥之酸泄氣乾薑之辛散寒

若嘔者去附子加生薑足前成半斤

氣逆則嘔附子補氣生薑散氣千金曰嘔家多服

生薑此爲嘔家聖藥

少陰病下利清穀裏寒外熱手足厥逆脈微欲絕身  
反不惡寒其人面赤色或腹痛或乾嘔或咽痛或利  
止脈不出者通脈四逆湯主之

下利清穀手足厥逆脈微欲絕爲裏寒身熱不惡  
寒面色赤爲外熱此陰甚於內格陽於外不相通  
也與通脈四逆湯散陰通陽



通脈四逆湯方

甘花二兩

附子大者一枚生用  
去皮破八片

乾薑三兩強人  
可四兩

右三味以水三升煮取一升二合去滓分温再服其

脈即出者愈

面色赤者加葱九莖

葱味辛以通陽氣

腹中痛者去葱加芍藥二兩

芍藥之酸通寒利腹中痛為氣不通也

嘔者加生薑二兩

辛以散之嘔為氣不散也

咽痛者去芍藥加桔梗一兩

咽中如結加桔梗則能散之

利止脈不出者去桔梗加人參二兩

利止脈不出者亡血也加人參以補之經曰脈微而利亡血也四逆加人參湯主之脈病皆與方相應者乃可服之

少陰病四逆其人或欬或悸或小便不利或腹中痛或泄利下重者四逆散主之

四逆者四肢不溫也傷寒邪在三陽則手足必熱傳到太陰手足自溫至少陰則邪熱漸深故四肢逆而不溫也及至厥陰則手足厥冷是又甚於逆四逆散以散傳陰之熱也

四逆散方

甘草 炙 甘 平

枳實 破 水 漬 炙 乾 苦 寒 微

柴胡 苦 寒

芍藥 酸 微 寒

內經曰熱淫於內佐以甘苦以酸收之以苦發之  
枳實甘草之甘苦以泄裏熱芍藥之酸以收陰氣  
柴胡之苦以發表熱

右四味各拾分搗篩白飲和服方寸匕日三服

欬者加五味子乾薑各伍分并主下痢

肺寒氣逆則欬五味子之酸收逆氣乾薑之辛散  
肺寒并主下痢者肺與大腸爲表裏上欬下痢治  
則頗同

悸者加桂枝伍分

悸者氣虛而不能通行心下築築然悸動也桂猶  
圭也引導陽氣若熱以使

小便不利者加茯苓伍分

茯苓味甘而淡用以滲泄

腹中痛者加附子一枚炮令拆

裏虛遇邪則痛加附子以補虛

泄利下重者先以水五升煮薤白三升煮取三升去滓以散三方寸匕內湯中煮取一升半分溫再服

泄利下重者下焦氣滯也加薤白以泄氣滯

少陰病下利六七日欬而嘔渴心煩不得眠者猪苓湯主之

下利不渴者裏寒也經曰自利不渴者屬太陰以其藏寒故也此下利嘔渴知非裏寒心煩不得眠知協熱也與猪苓湯滲泄小便分別水穀經曰復不止當利其小便此之謂歟

少陰病得之二三日口燥咽乾者急下之宜大承氣湯

傷寒傳經五六日邪傳少陰則口燥舌乾而渴爲邪漸深也今少陰病得之二三日邪氣未深入之時便作口燥咽乾者是邪熱已甚腎水乾也急與大承氣湯下之以全腎也

少陰病自利清水色純青心下必痛口乾燥者急下之宜大承氣湯

少陰腎水也青肝色也自利色青爲肝邪乘腎難經曰從前來者其實邪以腎蘊實邪必心下痛口乾燥也與大承氣湯以下實邪

少陰病六七日腹脹不大便者急下之宜大承氣湯此少陰入府也六七日少陰之邪入府之時陽明內熱壅甚腹滿不大便也陽明病土勝腎水則乾急與大承氣湯下之以救腎水

少陰病脈沉者急溫之宜四逆湯

既吐且利小便復利而大汗出下利清穀內寒外熱脈微欲絕者不云急溫此少陰病脈沉而云急溫者彼雖寒甚然而證已形見於外治之則有成法此初頭脈沉未有形證不知邪氣所之將發何病是急與四逆湯溫之

少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之宜四逆湯傷寒表邪傳裏至於少陰少陰之脈從肺出絡心注胸中邪既留於胸中而不散者飲食入口則吐心中溫溫欲吐陽受氣於胸中邪既留於胸中則陽氣不得宣發於外是以始得之手足寒脈弦遲

此是胸中實不可下而當吐其膈上有寒飲亦使  
人心中溫溫而手足寒吐則物出嘔則物不出吐  
與嘔別焉胸中實則吐而物出若膈上有寒飲則  
但乾嘔而不吐也此不可吐可與四逆湯以溫其  
膈

少陰病下利脈微澁嘔而汗出必數更衣反少者當  
溫其上灸之

脈微爲亡陽澁爲亡血下利嘔而汗出亡陽亡血  
也津液不足裏有虛寒必數更衣反少者溫其上  
以助其陽也灸之以消其陰

辨厥陰病脈證并治第十二

厥陰之爲病消渴氣上撞心中疼熱飢而不欲食  
食則吐衄下之利不止

邪傳厥陰則熱已深也邪自太陽傳至太陰則腹滿而噤乾未成渴也邪至少陰者口燥舌乾而渴未成消也至厥陰成消渴者熱甚能消水故也飲水多而小便少者謂之消渴木生於火肝氣通心厥陰客熱氣上撞心中疼熱傷寒六七日厥陰受病之時爲傳經盡則當入府胃虛客熱飢不欲食虵在胃中無食則動聞食嗅而出得食吐虵此熱在厥陰經也若便下之虛其胃氣厥陰木邪相乘必吐下不止

厥陰中風脈微浮爲欲愈不浮爲未愈

經曰陰病見陽脈而生浮者陽也厥陰中風脈微浮爲邪氣還表向汗之時故云欲愈

厥陰病欲解時從寅至卯上



厥陰木也王於卯丑寅向王故爲解時

厥陰病渴欲飲水者少少與之愈

邪至厥陰爲傳經盡欲汗之時渴欲得水者少少與之胃氣得潤則愈

諸四逆厥者不可下之虛家亦然

四逆者四肢不溫也厥者手足冷也皆陽氣少而陰氣多故不可下虛家亦然下之是爲重虛金匱玉函曰虛者十補勿一瀉之

傷寒先厥後發熱而利者必自止見厥復利

陰氣勝則厥逆而利陽氣復則發熱利必自止見厥則陰氣還勝而復利也

傷寒始發熱六日厥反九日而利凡厥利者當不能食今反能食者恐爲除中食以索餅不發熱者知胃

氣尚在必愈恐暴熱來出而復去也後三日脈之其熱續在者期之日日夜半愈所以然者本發熱六日厥反九日復發熱三日并前六日亦爲九日與厥相應故期之日日夜半愈後三日脈之而脈數其熱不罷者此爲熱氣有餘必發癰膿也

始發熱邪在表也至六日邪傳厥陰陰氣勝者作厥而利厥反九日陰寒氣多當不能食而反能食者恐爲除中除去也中胃氣也言邪氣大甚除去胃氣胃欲引食自救故暴能食此欲勝也食以索餅試之若胃氣絕得麵則必發熱若不發熱者胃氣尚在也恐是寒極變熱因暴熱來而復去使之能食非除中也金匱要略曰病人素不能食而反暴思之必發熱後三日脈之其熱續在者陽氣勝

也期之旦日夜半愈若旦日不愈後三日脈數而熱不罷者爲熱氣有餘必發癰膿經曰數脈不時則生惡瘡

傷寒脈遲六七日而反與黃芩湯徹其熱脈遲爲寒今與黃芩湯復除其熱腹中應冷當不能食今反能食此名除中必死

傷寒脈遲六七日爲寒氣已深反與黃芩湯寒藥兩寒相搏腹中當冷冷不消穀則不能食反能食者除中也四時皆以胃氣爲本胃氣已絕故云必死

傷寒先厥後發熱下利必自止而反汗出咽中痛者其喉爲痺發熱無汗而利必自止若不止必便膿血便膿血者其喉不痺

傷寒先厥而利陰寒氣勝也寒極變熱後發熱下利必自止而反汗出咽中痛其喉爲痹者熱氣上行也發熱無汗而利必自止利不止必便膿血者熱氣下行也熱氣下而不上其喉亦不痹也

傷寒一二日至四五日而厥者必發熱前熱者後必厥厥深者熱亦深厥微者熱亦微厥應下之而反發汗者必口傷爛赤

前厥後發熱者寒極生熱也前熱後厥者陽氣內陷也厥深熱深厥微熱微隨陽氣陷之深淺也熱之伏深必須下去之反發汗者引熱上行必口傷爛赤內經曰火氣內發上爲口糜

傷寒病厥五日熱亦五日設六日當復厥不厥者自愈厥終不過五日以熱五日故知自愈

陰勝則厥陽勝則熱先厥五日爲陰勝至六日陽復勝熱亦五日後復厥者陰復勝若不厥爲陽全勝故自愈經曰發熱四日厥反三日復熱四日厥少熱多其病爲愈

凡厥者陰陽氣不相順接便爲厥厥者手足逆冷是也

手之三陰三陽相接於手十指足之三陰三陽相接於足十指陽氣內陷陽不與陰相順接故手足爲之厥冷也

傷寒脈微而厥至七八日膚冷其人躁無暫安時者此爲藏厥非爲虵厥也虵厥者其人當吐虵今病者靜而復時煩此爲藏寒虵上入膈故煩須臾復止得食而嘔又煩者虵聞食臭出其人自吐虵虵厥者烏

梅圓主之又主久利方

藏厥者死陽氣絕也虬厥雖厥而煩吐虬已則靜  
不若藏厥而躁無暫安時也病人藏寒胃虛虬動  
上膈聞食臭出因而吐虬與烏梅圓温藏安蟲

烏梅圓方

烏梅

三百箇  
味酸温

細辛

六兩  
辛熱

乾薑

十兩  
辛熱

黃連

一斤  
苦寒

當歸

四兩  
辛温

附子

六兩  
辛熱  
炮

蜀椒

四兩  
辛熱  
去

桂枝

六兩  
辛熱

人參

六兩  
甘温

黃蘗

六兩  
苦寒

肺主氣肺欲收急食酸以收之烏梅之酸以收肺  
氣脾欲緩急食甘以緩之人參之甘以緩脾氣寒  
淫於內以辛潤之以苦堅之當歸桂椒細辛之辛  
以潤內寒寒淫所勝平以辛熱薑附之辛熱以勝

寒虬得甘則動得苦則安黃連黃蘗之苦以安虬  
右十味異搗篩合治之以苦酒漬烏梅一宿去核蒸  
之五升米下飯熟擣成塗和藥令相得內臼中與蜜  
杵二千下員如梧梧子大先食飲服十圓日三服稍  
加至二十圓禁生冷滑物臭食等

傷寒熱少厥微指頭寒默默不欲食煩躁數日小便  
利色白者此熱除也欲得食其病爲愈若厥而嘔胸  
脇煩滿者其後必便血

指頭寒者是厥微熱少也默默不欲食煩躁者邪  
熱初傳裏也數日之後小便色白裏熱去欲得食  
爲胃氣已和其病爲愈厥陰之脈挾胃貫膈市脇  
肋厥而嘔胸脇煩滿者傳邪之熱甚於裏也厥陰  
肝主血後數日熱不去又不得外泄迫血下行必

致便血

病者手足厥冷言我不結胸小腹滿按之痛者此冷結在膀胱關元也

手足厥不結胸者無熱也小腹滿按之痛下焦冷結也

傷寒發熱四日厥反三日復熱四日厥少熱多其病當愈四日至七日熱不除者其後必便膿血

先熱後厥者陽氣邪傳裏也發熱爲邪氣在表至四日後厥者傳之陰也後三日復傳陽經則復熱厥少則邪微熱多爲陽勝其病爲愈至七日傳經盡熱除則愈熱不除者爲熱氣有餘內搏厥陰之血其後必大便膿血

傷寒厥四日熱反三日復厥五日其病爲進寒多熱



少陽氣退故爲進也

傷寒陰勝者先厥至四日邪傳裏重陰必陽却熱三日七日傳經盡當愈若不愈而復厥者傳作再經至四日則當復熱若不復熱至五日厥不除者陰勝於陽其病進也

傷寒六七日脈微手足厥冷煩燥灸厥陰厥不還者死

傷寒六七日則正氣當復邪氣當罷脈浮身熱爲欲解若反脈微而厥則陰勝陽也煩燥者陽虛而爭也灸厥陰以復其陽厥不還則陽氣已絕不能復正而死

傷寒發熱下利厥逆躁不得臥者死

傷寒發熱邪在表也下利厥逆陽氣虛也躁不得

珍做宋版  
臥者病勝藏也故死

傷寒發熱下利至甚厥不止者死

金匱要略曰六府氣絕於外者手足寒五藏氣絕於內者利下不禁傷寒發熱爲邪氣獨甚下利至甚厥不止爲府藏氣絕故死

傷寒六七日不利便發熱而利其人出汗不止者死有陰無陽故也

傷寒至七日爲邪正爭之時正勝則生邪勝則死始不下利而暴忽發熱下利汗出不止者邪氣勝正氣脫也故死

傷寒五六日不結胸腹濡脈虛復厥者不可下此爲亡血下之死

傷寒五六日邪氣當作裏實之時若不結胸而腹

濡者裏無熱也脈虛者亡血也復厥者陽氣少也  
不可下下之爲重虛故死金匱玉函曰虛者重瀉  
真氣乃絕

發熱而厥七日下利者爲難治

發熱而厥邪傳裏也至七日傳經盡則正氣勝邪  
當汗出而解反下利則邪氣勝裏氣虛則爲難治  
傷寒脈促手足厥逆者可灸之

脈促則爲陽虛不相續厥逆則爲陽虛不相接灸  
之以助陽氣

傷寒脈滑而厥者裏有熱也白虎湯主之

滑爲陽厥氣內陷是裏熱也與白虎湯以散裏熱  
也

手足厥寒脈細欲絕者當歸四逆湯主之

手足厥寒者陽氣外虛不温四末脈細欲絕者陰血內弱脈行不利與當歸四逆湯助陽生陰也

當歸四逆湯方

當歸三兩 辛温

桂枝三兩 辛熱

芍藥三兩 酸寒

細辛三兩 辛熱

大棗二十五箇 甘温甘草二兩 甘平

通草二兩 甘平

內經曰脈者血之府也諸血者皆屬心通脈者必先補心益血苦先入心當歸之苦以助心血心苦緩急食酸以收之芍藥之酸以收心氣肝苦急急食甘以緩之大棗甘草通草之甘以緩陰血

右柒味以水八升煮取三升去滓温服一升日三服若其人內有久寒者宜當歸四逆加吳茱萸生薑湯主之

茱萸辛溫以散久寒生薑辛溫以行陽氣

大汗出熱不去內拘急四肢疼又下利厥逆而惡寒者四逆湯主之

大汗出則熱當去熱反不去者亡陽也內拘急下利者寒甚於裏四肢疼厥逆而惡寒者寒甚於表與四逆湯復陽散寒

大汗若大下利而厥冷者四逆湯主之

大汗若大下利內外雖殊其亡津液損陽氣則一也陽虛陰勝故生厥逆與四逆湯固陽退陰

病人手足厥冷脈乍緊者邪結在胸中心中滿而煩飢不能食者病在胸中當須吐之宜瓜蒂散

手足厥冷者邪氣內陷也脈緊牢者爲實邪氣入府則脈沉今脈乍緊知邪結在胸中爲實故心下

滿而煩胃中無邪則喜飢以病在胸中雖飢而不能食與瓜蒂散以吐胸中之邪

傷寒厥而心下悸者宜先治水當服茯苓甘草湯却治其厥不爾水漬入胃必作利也

金匱要略曰水停心下甚者則悸厥雖寒勝然以心下悸爲水飲內甚先與茯苓甘草湯治其水而後治其厥若先治厥則水飲浸漬入胃必作下利傷寒六七日大下後寸脈沉而遲手足厥逆下部脈不至咽喉不利唾膿血泄利不止者爲難治麻黃升麻湯主之

傷寒六七日邪傳厥陰之時大下之後下焦氣虛陽氣內陷寸脈遲而手足厥逆下部脈不至厥陰之脈貫膈上注肺循喉嚨在厥陰隨經射肺因亡

津液遂成肺痿咽喉不利而唾膿血也金匱要略  
曰肺痿之病從何得之被快藥下利重亡津液故  
得之若泄利不止者為裏氣大虛故云難治與麻  
黃升麻湯以調肝肺之氣

麻黃升麻湯方

麻黃二兩半去節甘溫

升麻一兩一分甘平

當歸一兩一分辛溫

知母苦寒

黃芩苦寒

萎蕤甘平各十八銖

石膏碎綿裹甘寒

白朮甘溫

乾薑辛熱

芍藥酸平

天門冬去心甘平

桂枝辛熱

茯苓甘平

甘草炙甘平各六銖

玉函曰大熱之氣寒以取之甚熱之氣以汗發之  
麻黃升麻之甘以發浮熱正氣虛者以辛潤之當  
歸桂薑之辛以散寒上熱者以苦泄之知母黃芩

之苦涼心去熱津液少者以甘潤之茯苓白朮之  
甘緩脾生津肺燥氣熱以酸收之以甘緩之芍藥  
之酸以斂逆氣萎蕤門冬石膏甘草之甘潤肺除  
熱

右十四味以水一斗先煮麻黃一兩沸去上沫內諸  
藥煮取三升去滓分溫三服相去如炊三斗米頃令  
盡汗出愈

傷寒四五日腹中痛苦轉氣下趣少腹者此欲自利  
也

傷寒四五日邪氣傳裏之時腹中痛轉氣下趣少  
腹者裏虛遇寒寒氣下行欲作自利也

傷寒本自寒下醫復吐下之寒格更逆吐下若食入  
口卽吐乾薑黃連黃芩人參湯主之



傷寒邪自傳表爲本自寒下醫反吐下損傷正氣  
寒氣內爲格拒經曰格則吐逆食入口卽吐謂之  
寒格更復吐下則重虛而死是更逆吐下與乾薑  
黃連黃芩人參湯以通寒格

乾薑黃連黃芩人參湯方

乾薑 辛熱

黃連 苦寒

黃芩 苦寒

人參 甘溫各  
三兩

辛以散之甘以緩之乾薑人參之甘辛以補正氣  
苦以泄之黃連黃芩之苦以通寒格

右四味以水六升煮取二升去滓分溫再服

下利有微熱而渴脈弱者今自愈

下利陰寒之疾反大熱者逆有微熱而渴裏氣方  
溫也經曰諸弱發熱脈弱者陽氣得復也今必自

愈

下利脈數有微熱汗出今自愈設復緊爲未解

下利陰病也脈數陽脈也陰病見陽脈者生微熱汗出陽氣得通也利必自愈諸緊爲寒設復脈緊陰氣猶勝故云未解

下利手足厥冷無脈者灸之不溫若脈不還反微喘者死者死

下利手足厥逆無脈者陰氣獨勝陽氣大虛也灸之陽氣復手足溫而脈還爲欲愈若手足不溫脈不還者陽已絕也反微喘者陽氣脫也

少陰負趺陽者爲順也

少陰腎水趺陽脾土下利爲腎邪干脾水不勝土則爲微邪故爲順也

下利寸脈反浮數尺中自濇者必清膿血

下利者脈當沉而遲反浮數者裏有熱也濇爲無血尺中自濇者腸胃血散也隨利下便膿血清與  
圖通脈經曰清者廁也

下利清穀不可攻表出汗必脹滿

下利者脾胃虛也胃爲津液之主發汗亡津液則  
胃氣愈虛必脹滿

下利脈沉弦者下重也脈大者爲未止脈微弱數者  
爲欲自止雖發熱不死

沉爲在裏弦爲拘急裏氣不足是主下重大則病  
進此利未止脈微弱數者邪氣微而陽氣復爲欲  
自止雖發熱止由陽勝非大逆也

下利脈沉而遲其人面少赤身有微熱下利清穀者

必鬱冒汗出而解病人必微厥所以然者其面戴陽下虛故也

下利清穀脈沉而遲裏有寒也面少赤身有微熱表未解也病人微厥針經曰下虛則厥表邪欲解臨汗之時以裏先虛必鬱冒然後汗出而解也

下利脈數而渴者今自愈設不差必清膿血以有熱故也

經曰脈數不解而下不止必協熱便膿血也

下利後脈絕手足厥冷晬時脈還手足溫者生脈不還者死

下利後脈絕手足厥冷者無陽也晬時周時也周時厥愈脈出為陽氣復則生若手足不溫脈不還者為陽氣絕則死

傷寒下利日十餘行脈反實者死

下利者裏虛也脈當微弱反實者病勝藏也故死  
難經曰脈不應病病不應脈是爲死病

下利清穀裏寒外熱汗出而厥者通脈四逆湯主之  
下利清穀爲裏寒身熱不解爲外熱汗出陽氣通  
行於外則未當厥其汗出而厥者陽氣大虛也與  
通脈四逆湯以固陽氣

熱利下重者白頭翁湯主之

利則津液少熱則傷氣氣虛下利致後重也與白  
頭翁湯散熱厚腸

白頭翁湯方

白頭翁

二兩  
苦寒

黃柏

苦寒

黃連

苦寒

秦皮

苦寒各  
三兩

內經曰腎欲堅急食苦以堅之利則下焦虛是以純苦之劑堅之

右四味以水七升煮取二升去滓溫服一升不愈更服一升

下利腹脹滿身體疼痛者先溫其裏乃攻其表溫裏四逆湯攻表桂枝湯

下利腹滿者裏有虛寒先與四逆湯溫裏身疼痛爲表未解利止裏和與桂枝湯攻表

下利欲飲水者以有熱故也白頭翁湯主之

自利不渴爲藏寒與四逆以溫藏下利飲水爲有熱與白頭翁湯以涼中

下利讖語者有燥屎也宜小承氣湯

經曰實則讖語有燥屎爲胃實下利爲腸虛與小

承氣湯以下燥屎

下利後更煩按之心下濡者爲虛煩也宜梔子豉湯  
下利後不煩爲欲解若更煩而心下堅者恐爲谷  
煩此煩而心下濡者是邪熱乘虛客於胸中爲虛  
煩也與梔子豉湯吐之則愈

嘔家有癰膿者不可治嘔膿盡自愈

胃脘有癰則嘔而吐膿不可治嘔得膿盡嘔亦自  
愈

嘔而脈弱小便復利身有微熱見厥者難治四逆湯  
主之

嘔而脈弱爲邪氣傳裏嘔則氣上逆而小便當不  
利小便復利者裏虛也身有微熱見厥者陰勝陽  
也爲難治與四逆湯溫裏助陽

乾嘔吐涎沫頭痛者吳茱萸湯主之

乾嘔吐涎沫者裏寒也頭痛者寒氣上攻也與吳茱萸湯溫裏散寒

嘔而發熱者小柴胡湯主之

經曰嘔而發熱者柴胡證具

傷寒大吐大下之極虛復極汗出者以其人外氣怫鬱復與之水以發其汗因得噦所以然者胃中寒冷故也

大吐大下胃氣極虛復極發汗又亡陽氣外邪怫鬱於表則身熱醫與之水以發其汗胃虛得水虛寒相搏成噦也

傷寒噦而腹滿視其前後知何部不利利之則愈

噦而腹滿氣上而不下也視其前後部有不利者



卽利之以降其氣前部小便也後部大便也

釋音

蹠

音拳不伸也

憤

扶粉切懣也

惡濕

上烏路切取也憎也

撞

宅江切擊也

註解傷寒論卷第六



註解傷寒論卷第七之八

漢張仲景著

晉王叔和撰次

宋成無已註

明汪濟川校正

辨霍亂病脈證并治第十三

問曰病有霍亂者何答曰嘔吐而利名曰霍亂

三焦者水穀之道路邪在上焦則吐而不利邪在下焦則利而不吐邪在中焦則既吐且利以飲食不節寒熱不調清濁相干陰陽乖隔遂成霍亂輕者止曰吐利重者揮霍撩亂名曰霍亂

問曰病發熱頭痛身疼惡寒吐利者此屬何病答曰此名霍亂自吐下又利止復更發熱也

發熱頭痛身疼惡寒者本是傷寒因邪入裏傷於脾胃上吐下利令爲霍亂利止裏和復更發熱者

還是傷寒必汗出而解

傷寒其脈微澀者本是霍亂今是傷寒却四五日至陰經上轉入陰必利本嘔下利者不可治也欲似大便而反失氣仍不利者屬陽明也便必鞭十三日愈所以然者經盡故也

微爲亡陽澀爲亡血傷寒脈微澀則本是霍亂吐利亡陽亡血吐利止傷寒之邪未已還是傷寒却四五日邪傳陰經之時裏虛遇邪必作自利本嘔者邪甚於上又利者邪甚於下先霍亂裏氣大虛又傷寒之邪再傳爲吐利是重虛也故爲不治若欲似大便而反失氣仍不利者利爲虛不利爲實欲大便而反失氣裏氣熱也此屬陽明便必鞭也十三日愈者傷寒六日傳遍三陰三陽後六日再

傳經盡則陰陽之氣和大邪之氣去而愈也

下利後當便鞦鞦則能食者愈今反不能食到後經中頗能食復過一經能食過之一日當愈不愈者不屬陽明也

下利後亡津液當便鞦能食爲胃和必自愈不能食者爲未和到後經中爲復過一經言七日後再經也頗能食者胃氣方和過一日當愈不愈者暴熱使之能食非陽明氣和也

惡寒脈微而復利利止亡血也四逆加人參湯主之惡寒脈微而利者陽虛陰勝也利止則津液內竭故云亡血金匱玉函曰水竭則無血與四逆湯溫經助陽加人參生津液益血

霍亂頭痛發熱身疼痛熱多欲飲水者五苓散主之

寒多不用水者理中丸主之

頭痛發熱則邪自風寒而來中焦爲寒熱相半之分邪稍高者居陽分則爲熱熱多欲飲水者與五苓散以散之邪稍下者居陰分則爲寒寒多不用水者與理中丸溫之

理中丸方

人參 甘溫

甘草 炙甘平

白朮 甘溫

乾薑 辛熱已上各三兩

內經曰脾欲緩急食甘以緩之用甘補之人參白朮甘草之甘以緩脾氣調中寒淫所勝平以辛熱乾薑之辛以溫胃散寒

右四味搗篩爲末蜜和丸如鷄黃大以沸湯數合和一丸研碎溫服之日三四夜二服腹中未熱益至三

四九然不及湯湯法以四物依兩數切用水八升煮取三升去滓溫服一升日三服加減法

若臍上築者腎氣動也去朮加桂四兩  
脾虛腎氣動者臍上築動內經曰甘者令人中滿  
朮甘壅補桂泄奔豚是相易也

吐多者去朮加生薑三兩

嘔家不喜甘故去朮嘔家多服生薑以辛散之  
下多者還用朮悸者加茯苓二兩

下多者用朮以去濕悸加茯苓以導氣

渴欲得水者加朮足前成四兩半

津液不足則渴朮甘以緩之

腹中痛者加人參足前成四兩半

裏虛則痛加人參以補之

寒者加乾薑足前成四兩半

寒淫所勝平以辛熱

腹滿者去朮加附子一枚服湯後如食頃飲熱粥一升許微自溫勿發揭衣被

胃虛則氣壅腹滿甘令人中滿是去朮也附子之辛以補陽散壅

吐利止而身痛不休者當消息和解其外宜桂枝湯小和之

吐利止裏和也身痛不休表未解也與桂枝湯小和之外臺云裏和表病汗之則愈

吐利汗出發熱惡寒四肢拘急手足厥冷者四逆湯主之

上吐下利裏虛汗出發熱惡寒表未解也四肢拘



急手足厥冷陽虛陰勝也與四逆湯助陽退陰  
既吐且利小便復利而大汗出下利清穀內寒外熱  
脈微欲絕者四逆湯主之

吐利亡津液則小便當少小便復利而大汗出津  
液不禁陽氣大虛也脈微爲亡陽若無外熱但內  
寒下利清穀爲純陰此以外熱爲陽未絕猶可與  
四逆湯救之

吐已下斷汗出而厥四肢拘急不解脈微欲絕者通  
脈四逆加豬膽汁湯主之

吐已下斷津液內竭則不當汗出汗者不當厥  
今汗出而厥四肢拘急不解脈微欲絕者陽氣大  
虛陰氣獨勝也若純與陽藥恐陰爲格拒或嘔或  
躁不得復入也與通脈四逆湯加豬膽汁膽苦入

心而通脈膽寒補肝而和陰引置湯藥不被格拒  
內經曰微者逆之甚者從之此之謂也

吐利發汗脈平小煩者以新虛不勝穀氣故也

內經曰食入於陰長氣於陽新虛不勝穀氣是生

小煩

辨陰陽易差後勞復病證并治第十四

傷寒陰陽易之為病其人身體重少氣少腹裏急或  
引陰中拘攣熱上衝胸頭重不欲舉眼中生花膝脛  
拘急者燒裊散主之

大病新差血氣未復餘熱未盡強合陰陽得病者

名曰易男子病新差未平復而婦人與之交得病

名曰陽易婦人病新差未平復而男子與之交得病

名曰陰易以陰陽相感動其餘毒相染著如換易

也其人病身體重少氣者損動真氣也少腹裏急引陰中拘攣膝脛拘急陰氣極也熱上衝胸頭重不欲舉眼中生花者感動之毒所易之氣薰蒸於上也與燒裊散以道陰氣

燒裊散方

右取婦人中裊近隱處剪燒灰以水和服方寸七日三服小便卽利陰頭微腫則愈婦人病取男子裊當燒灰

大病差後勞復者枳實梔子湯主之若有宿食者加大黃如博碁子大五六枚

病有勞復有食復傷寒新差血氣未平餘熱未盡早作勞動病者名曰勞復病熱少愈而強食之熱有所藏因其穀氣留搏兩陽相合而病者名曰食

復勞復則熱氣浮越與枳實梔子豉湯以解之食復則胃有宿積加大黃以下之

枳實梔子豉湯方

枳實三枚炙梔子十四枚豉一升綿裹

以其熱聚於上苦則吐之熱散於表者苦則發之內經曰火淫所勝以苦發之此之謂也

右三味以清漿水七升空煮取四升內枳實梔子煮取二升下豉更煮五六沸去滓温分再服覆令微似汗

傷寒差已後更發熱者小柴胡湯主之脈浮者以汗解之脈沉實者以下解之

差後餘熱未盡更發熱者與小柴胡湯以和解之

脈浮者熱在表也故以汗解脈沉者熱在裏也故以下解之

大病差後從腰已下有水氣者牡礪澤瀉散主之

大病差後脾胃氣虛不能制約腎水水溢下焦腰以下為腫也金匱要略曰腰以下腫當利小便與牡礪澤瀉散利小便而散水也

牡礪澤瀉散方

牡礪鹹平

澤瀉鹹寒

括萋根苦寒

蜀漆辛平

葶藶苦寒

商陸根熱辛酸

海藻鹹寒  
已上各等分

鹹味勇泄牡礪澤瀉海藻之鹹以泄水氣內經曰濕淫於內平以苦佐以酸辛以苦泄之蜀漆葶藶括萋商陸之酸辛與苦以導腫濕

右七味異搗下篩爲散更入白中治之白飲和服方寸七小便利止後日三服

大病差後喜唾久不了了者胃上有寒當以丸藥温之宜理中丸

汗後陽氣不足胃中虛寒不內津液故喜唾不了了與理中丸以温其胃

傷寒解後虛羸少氣氣逆欲吐者竹葉石膏湯主之傷寒解後津液不足而虛羸餘熱未盡熱則傷氣

故少氣氣逆欲吐與竹葉石膏湯調胃散熱

竹葉石膏湯方

竹葉二把 辛平

石膏一斤 甘寒

半夏半升 辛温 洗

人參二兩 甘温

甘草二兩 甘平 炙

粳米半升 微寒 甘

麥門冬一升 平 去心 甘

辛甘發散而除熱竹葉石膏甘草之甘辛以發散  
餘熱甘緩脾而益氣麥門冬人參粳米之甘以補  
不足辛者散也氣逆者欲其散半夏之辛以散逆  
氣

右七味以水一斗煮取六升去滓內粳米煮米熟湯  
成去米溫服一升日三服

病人脈已解而日暮微煩以病新差人強與穀脾胃  
氣尚弱不能消穀故令微煩損穀則愈

陽明王於申酉戌宿食在胃故日暮微煩當小下  
之以損宿穀

辨不可發汗病脈證并治第十五

夫以爲疾病至急倉卒尋按要者難得故重集諸可  
與不可方治比之三陰三陽篇中此易見也又時有

不止是三陰三陽出在諸可與不可中也

諸不可汗不可下病證藥方前三陰三陽篇中經注已具者更不復出其餘無者於此已經後注備見

脈濡而弱弱反在關濡反在巔微反在上濇反在下微則陽氣不足濇則無血陽氣反微中風汗出而反躁煩濇則無血厥而且寒陽微發汗躁不得眠

寸關爲陽脈當浮盛弱反在關則裏氣不及濡反在巔則表氣不逮衛行脈外浮爲在上以候衛微反在上是陽氣不足榮行脈中沉爲在下以候榮澀反在下是無血也陽微不能固外腠理開疎風因客之故令汗出而躁煩無血則陰虛不與陽相順接故厥而且寒陽微無津液則不能作汗若發



汗則必亡陽而躁經曰汗多亡陽遂虛惡風煩躁  
不得眠也

動氣在右不可發汗發汗則衄而渴心苦煩飲卽吐  
水

動氣者築築然氣動也在右者在臍之右也難經  
曰肺內證臍右有動氣按之牢若痛肺氣不治正  
氣內虛氣動於臍之右也發汗則動肺氣肺主氣  
開竅於鼻氣虛則不能衛血血溢妄行隨氣出於  
鼻爲衄亡津液胃燥則煩渴而心苦煩肺惡寒飲  
冷則傷肺故飲卽吐水

動氣在左不可發汗發汗則頭眩汗不止筋惕肉瞤  
難經曰肝內證臍左有動氣按之牢若痛肝氣不  
治正氣內虛氣動於臍之左也肝爲陰之主發汗

汗不止則亡陽外虛故頭眩筋惕肉瞤鍼經曰上  
虛則眩

動氣在上不可發汗發汗則氣上衝正在心端

難經曰心內證臍上有動氣按之牢若痛心氣不  
治正氣內虛氣動於臍之上也心爲陽發汗亡陽  
則愈損心氣腎乘心虛欲上凌心故氣上衝正在  
心端

動氣在下不可發汗發汗則無汗心中大煩骨節苦  
疼目運惡寒食則反吐穀不得前

難經曰腎內證臍下有動氣按之牢若痛腎氣不  
治正氣內虛動氣發於臍之下也腎者主水發汗  
則無汗者水不足也心中大煩者腎虛不能制心  
火也骨節苦疼者腎主骨也目運者腎病則目眩

眩如無所見惡寒者腎主寒也食則反吐穀不得  
前者腎水乾也王冰曰病嘔而吐食久反出是無  
水也

咽中閉塞不可發汗發汗則吐血氣欲絕手足厥冷  
欲得蹇臥不能自溫

咽門者胃之系胃經不和則咽內不利發汗攻陽  
血隨發散而上必吐血也胃經不和而反攻表則  
陽虛於外故氣欲絕手足冷欲蹇而不能自溫  
諸脈得數動微弱者不可發汗發汗則大便難腹中  
乾胃燥而煩其形相象根本異源

動數之脈爲熱在表微弱之脈爲熱在裏發汗亡  
津液則熱氣愈甚胃中乾燥故大便難腹中乾胃  
燥而煩根本雖有表裏之異逆治之後熱傳之則

一是以病形相象也

脈微而弱弱反在關濡反在巔弦反在上微反在下  
弦爲陽運微而陰寒上實下虛意欲得溫微弦爲虛  
不可發汗發汗則寒慄不能自還

弦在上則風傷氣風勝者陽爲之運動微在下則  
寒傷血血傷者裏爲之陰寒外氣沸鬱爲上實裏  
有陰寒爲下虛表熱裏寒意欲得溫若反發汗亡  
陽陰獨故寒慄不能自還

欬者則劇數吐涎沫咽中必乾小便不利心中飢煩  
晬時而發其形似瘡有寒無熱虛而寒慄欬而發汗  
蹇而苦滿腹中復堅

肺寒氣逆欬者則劇吐涎沫亡津液咽中必乾小  
便不利膈中陽氣虛心中飢而煩一日一夜氣大

會於肺邪正相擊晬時而發形如寒瘡但寒無熱  
虛而寒慄發汗攻陽則陽氣愈虛陰寒愈甚故蹇  
而苦滿腹中復堅

厥脈緊不可發汗發汗則聲亂咽嘶舌萎聲不得前  
厥而脈緊則少陰傷寒也法當溫裏而反發汗則  
損少陰之氣少陰之脈入肺中循喉嚨挾舌本腎  
爲之本肺爲之標本虛則標弱故聲亂咽嘶舌萎  
聲不得前

諸逆發汗病微者難差劇者言亂目眩者死命將難  
全

不可發汗而強發之輕者因發汗而重而難差重  
者脫其陰陽之氣言亂目眩而死難經曰脫陽者  
見鬼是此言亂也脫陰者目盲是此目眩也眩非

玄而見玄是近於育也

效而小便利若失小便者不可發汗汗出則四肢厥逆冷

肺經虛冷上虛不能治下者效而小便利或失小便上虛發汗則陽氣外亡四肢者諸陽之本陽虛則不與陰相接故四肢厥逆冷

傷寒頭痛翕翕發熱形象中風常微汗出自嘔者下之益煩心中懊懺如飢發汗則致瘥身強難以屈伸熏之則發黃不得小便灸則發效唾

傷寒當無汗惡寒今頭痛發熱微汗出自嘔則傷寒之邪傳而爲熱欲行於裏若反下之邪熱乘虛流於胸中爲虛煩心懊懺如飢若發汗則虛表熱歸經絡熱甚生風故身強直而成瘥若熏之則火

熱相合消爍津液故小便不利而發黃肺惡火灸則火熱傷肺必發欬嗽而唾膿

辨可發汗證并治第十六

大法春夏宜發汗

春夏陽氣在外邪氣亦在外故可發汗

凡發汗欲令手足俱周時出以熨熨然一時間許亦佳不可令如水流漓若病不解當重發汗汗多必亡陽陽虛不得重發汗也

汗緩緩出則表裏之邪悉去汗大出則邪氣不除但亡陽也陽虛爲無津液故不可重發汗

凡服湯發汗中病便止不必盡劑

汗多則亡陽

凡云可發汗無湯者丸散亦可用要以汗出爲解然

不如湯隨證良驗

聖濟經曰湯液主治本乎腠理壅鬱除邪氣者於湯爲宜金匱玉函曰水能淨萬物故用湯也

夫病脈浮大問病者言但便鞭爾設利者爲大逆鞭爲實汗出而解何以故脈浮當以汗解

經曰脈浮大應發汗醫反下之爲大逆便鞭難雖爲裏實亦當先解其外若行利藥是爲大逆結胸雖急脈浮大猶不可下下之卽死況此便難乎經曰本發汗而復下之此爲逆若先發汗治不爲逆下利後身疼痛清便自調者急當救表宜桂枝湯發汗

外臺云裏和表病汗之則愈

辨發汗後病脈證并治第十七



發汗多亡陽讖語者不可下與柴胡桂枝湯和其榮衛以通津液後自愈

胃爲水穀之海津液之主發汗多亡津液胃中燥必發讖語此非實熱則不可下與柴胡桂枝湯和其榮衛通行津液津液生則胃潤讖語自止

此一卷第十七篇凡三十一證前有詳說

辨不可吐第十八

合四證已具太陽篇中

辨可吐第十九

大法春宜吐

春時陽氣在上邪氣亦在上故宜吐

凡用吐湯中病卽止不必盡劑也

要在適當不欲過也

病胸上諸實胸中鬱鬱而痛不能食欲使人按之而反有涎唾下利日十餘行其脈反遲寸口脈微滑此可吐之吐之利則止

胸上諸實或痰實或熱鬱或寒結胸中鬱而痛不能食欲使人按之反有涎唾者邪在下按之氣下而無涎唾此按之反有涎唾者知邪在胸中經曰下利脈遲而滑者內實也今下利日十餘行其脈反遲寸口脈微滑是上實也故可吐之玉函曰上盛不已吐而奪之

宿食在上脘者當吐之

宿食在中下脘者則宜下宿食在上脘則當吐內經曰其高者因而越之其下者引而竭之

病人手足厥冷脈乍結以客氣在胸中心下滿而煩

欲食不能食者病在胸中當吐之

此與第六卷厥陰門瓜蒂散證同彼云脈乍緊此云脈乍結惟此有異緊為內實乍緊則實未深是邪在胸中結為結實乍結則結未深是邪在胸中所以證治俱同也

釋音

拒

抑音巨也

函

咸音含又音函

眊

音荒目不明也

皖

音管胃府也

竭

渠孽切盡也

蒂

音帝瓜蒂也

註解傷寒論卷第七之八

通鑑綱目卷之八

宋高宗皇帝

建炎元年

春正月

金人陷建康

高宗幸杭州

秦桧為相

十一月

金人入臨江府

十二月

金人入揚州

註解傷寒論卷第九

漢張仲景著

晉王叔和撰次

宋成無已註

明汪濟川校正

辨不可下病脈證并治第二十

脈濡而弱弱反在關濡反在顛微反在上澁反在下  
微則陽氣不足澁則無血陽氣反微中風汗出而反  
躁煩澁則無血厥而且寒陽微不可下下之則心下  
痞鞭

陽微下之陽氣已虛陰氣內甚故心下痞鞭

動氣在右不可下下之則津液內竭咽燥鼻乾頭眩  
心悸也

動氣在右肺之動也下之傷胃動肺津液內竭咽  
燥鼻乾者肺屬金主燥也頭眩心悸者肺主氣而

虛也

動氣在左不可下下之則腹內拘急食不下動氣更劇雖有身熱臥則欲蹇

動氣在左肝之動也下之損脾而肝氣益勝復行於脾故腹內拘急食不下動氣更劇也雖有身熱以裏氣不足故臥則欲蹇

動氣在上不可下下之則掌握熱煩身上浮冷熱汗自泄欲得水自灌

動氣在上心之動也下之則傷胃內動心氣心爲火主熱鍼經曰心所生病者掌中熱肝爲藏中之陰病則雖有身熱臥則欲蹇作表熱裏寒也心爲藏中之陽病則身上浮冷熱汗自泄欲得水自灌作表寒裏熱也二藏陰陽寒熱明可見焉

動氣在下不可下下之則腹脹滿卒起頭眩食則下清穀心下痞也

動氣在下腎之動也下之則傷脾腎氣則動腎寒乘脾故有腹滿頭眩下清穀心下痞之證也

咽中閉塞不可下下之則上輕下重水漿不下臥則欲蹠身急痛下利日數十行

咽中閉塞胃已不和也下之則閉塞之邪爲上輕復傷胃氣爲下重至水漿不下臥則欲蹠身急痛下利日數十行知虛寒也

諸外實者不可下下之則發微熱亡脈厥者當臍握熱

外實者表熱也汗之則愈下之爲逆下後裏虛表熱內陷故發微熱厥深者熱亦深亡脈厥者則陽

氣深陷客於下焦故當臍握熱

諸虛者不可下下之則大渴求水者易愈惡水者劇  
金匱玉函曰虛者下補勿一瀉之虛家下之爲重  
虛內竭津液故令大渴求水者陽氣未竭而猶可  
愈惡水者陽氣已竭則難可制

脈濡而弱弱反在關濡反在巔弦反在上微反在下  
弦爲陽運微爲陰寒上實下虛意欲得溫微弦爲虛  
虛者不可下也

虛家下之是爲重虛難經曰實實虛虛損不足益  
有餘此者是中工所害也

微則爲逆欬則吐涎下之則欬止而利因不休利不  
休則胸中如蟲齧粥入則出小便不利兩脇拘急喘  
息爲難頸背相引擘則不仁極寒反汗出身冷若冰



眼睛不慧語言不休而穀氣多入此爲除中口雖欲  
言舌不得前

內經曰感於寒則受病微則爲欬甚則爲泄爲痛  
肺感微寒爲欬則脈亦微也下之氣下欬雖止而  
因利不休利不休則奪正氣而成危惡胸中如蟲  
齧粥入則出小便不利兩脇拘急喘息爲難者裏  
氣損也頸背相引臂爲不仁極寒反汗出身冷如  
冰者表氣損也表裏損極至陰陽俱脫眼睛不慧  
語言不休難經曰脫陽者見鬼脫陰者目盲陰陽  
脫者應不能食而穀多入者此爲除中是胃氣除  
去也口雖欲言舌不得前氣已衰脫不能運也  
脈濡而弱弱反在關濡反在巔浮反在上數反在下  
浮爲陽虛數爲無血浮爲虛數爲熱浮爲虛自汗出

而惡寒數爲痛振寒而慄微弱在關胸下爲急喘汗  
而不得呼吸呼吸之中痛在於脇振寒相搏形如瘡  
狀醫反下之故令脈數發熱狂走見鬼心下爲痞小  
便淋瀝小腹甚硬小便則尿血也

弱在關則陰氣內弱濡在巔則陽氣外弱浮爲虛  
浮在上則衛不足也故云陽虛陽虛不固故腠理  
汗出惡寒數亦爲虛數在下則榮不及故云亡血  
亡血則不能溫潤腑臟脈數而痛振而寒慄微弱  
在關邪氣傳裏也裏虛遇邪胸下爲急喘而汗出  
脇下引痛振寒如瘡此裏邪未實表邪未解醫反  
下之裏氣益虛邪熱內陷故脈數發熱狂走見鬼  
心下爲痞此熱陷於中焦者也若熱氣深陷則客  
於下焦使小便淋瀝小腹甚鞭小便尿血也

脈濡而緊濡則胃氣微緊則榮中寒陽微衛中風發熱而惡寒榮緊胃氣冷微嘔心內煩醫爲有大熱解飢而發汗亡陽虛煩躁心下苦痞堅表裏俱虛竭卒起而頭眩客熱在皮膚悵快不得眠不知胃氣冷緊寒在關元技巧無所施汲水灌其身客熱應時罷慄慄而振寒重被而覆之汗出而冒顛體惕而又振小便爲微難寒氣因水發清穀不容間嘔變反腸出顛倒不得安手足爲微逆身冷而內煩遲欲從後救安可復追還

胃冷榮寒陽微中風發熱惡寒微嘔心煩醫不溫胃反爲有熱解飢發汗則表虛亡陽煩躁心下痞堅先裏不足發汗又虛其表表裏俱虛竭卒起頭眩客熱在表悵快不得眠醫不救裏但責表熱汲

水灌洗以却熱客熱易罷裏寒益增慄而振寒復以重被覆之表虛遂汗出愈使陽氣虛也顛頂也顛冒而體振寒小便難者亡陽也寒因水發下爲清穀上爲嘔吐外有厥逆內爲燥煩顛倒不安雖欲拯救不可得也本草曰病勢已過命將難全

脈浮而大浮爲氣實大爲血虛血虛爲無陰孤陽獨下陰部者小便當赤而難胞中當虛今反小便利而大汗出法應衛家當微今反更實津液四射榮竭血盡乾煩而不得眠血薄肉消而成暴液醫復以毒藥攻其胃此爲重虛客陽去有期必下如汚渥而死

衛爲陽榮爲陰衛氣強實陰血虛弱陽乘陰虛下至陰部陰部下焦也陽爲熱則消津液當小便赤而難今反小便利而大汗出者陰氣內弱也經曰

陰弱者汗自出是以衛家不微而反更實榮竭血  
盡乾煩而不眠血薄則肉消而成暴液者津液四  
射也醫反下之又虛其裏是爲重虛孤陽因下而  
又脫去氣血皆竭胃氣內盡必下如汚溼而死也  
脈數者久數不止止則邪結正氣不能復正氣却結  
於藏故邪氣浮之與皮毛相得脈數者不可下下之  
則必煩利不止

數爲熱止則邪氣結於經絡之間正氣不能復行  
於表則却結於藏邪氣獨浮於皮毛下之虛其裏  
邪熱乘虛而入裏虛叶熱必煩利不止

脈浮大應發汗醫反下之此爲大逆

浮大屬表故不可下病欲吐者不可下

嘔多雖有陽明證不可攻之

爲邪猶在胸中也

太陽病外證未解不可下下之爲逆

表未解者雖有裏證亦不可下當先解外爲順若反下之則爲逆也經曰本發汗而復下之此爲逆也若先發汗治不爲逆

夫病陽多者熱下之則鞭

陽熱證多則津液少下之雖除熱復損津液必便難也或謂陽多者表熱也下之則心下鞭

無陽陰強大便鞭者下之則必清穀腹滿

無陽者亡津液也陰強者寒多也大便秘則爲陰結下之虛胃陰寒內甚必清穀腹滿

傷寒發熱頭痛微汗出發汗則不識人熏之則喘不得小便心腹滿下之則短氣小便難頭痛背強加溫

針則衄

傷寒則無汗發熱頭痛微汗出者寒邪變熱欲傳於裏也發汗則亡陽增熱故不識人若以火熏之則火熱傷氣內消津液結爲裏實故喘不得小便心腹滿若反下之則內虛津液邪欲入裏外動經絡故短氣小便難頭痛背強若加溫針益陽增熱必動其血而爲衄也

傷寒脈陰陽俱緊惡寒發熱則脈欲厥厥者脈初來大漸漸小更來漸漸大是其候也如此者惡寒甚者翕翕汗出喉中痛熱多者目赤脈多睛不慧醫復發之咽中則傷若復下之則兩目閉寒多者便清穀熱多者便膿血若熏之則身發黃若熨之則咽燥若小便利者可救之小便難者爲危殆

脈陰陽俱緊則清邪中上濁邪中下太陽少陰俱感邪也惡寒者少陰發熱者太陽脈欲厥者表邪欲傳裏也惡寒甚者則變熱翕翕汗出喉中痛以少陰之脈循喉嚨故也熱多者太陽多也目赤脈多者睛不慧以太陽之脈起於目故也發汗攻陽則少陰之熱因發而上行故咽中傷若復下之則太陽之邪因虛而內陷故兩目閉陰邪下行爲寒多必便清穀陽邪下行爲熱多必便膿血熏之則火熱甚身必發黃熨之則火熱輕必爲咽燥小便利者爲津液未竭猶可救之小便難者津液已絕則難可制而危殆矣

傷寒發熱口中勃勃氣出頭痛目黃衄不可制貪水者必嘔惡水者厥若下之咽中生瘡假令手足溫者



必下重便膿血頭痛目黃者若下之則兩目閉貪水者脈必厥其聲嚶咽喉塞若發汗則戰慄陰陽俱虛惡水者若下之則裏冷不嗜食大便完穀出若發汗則口中傷舌上白胎煩燥脈數實不大便六七日後必便血若發汗則小便自利也

傷寒發熱寒變熱也口中勃勃氣出熱客上膈也頭痛目黃血不可制者熱烝於上也千金曰無陽卽厥無陰卽嘔貪水者必嘔則陰虛也惡水者厥則陽虛也發熱口中勃勃氣出者咽中已熱也若下之亡津液則咽中生瘡熱因裏虛而下若熱氣內結則手足必厥設手足溫者熱氣不結而下行作叶熱利下重便膿血也頭痛目黃者下之熱氣內伏則目閉也貪水爲陰虛下之又虛其裏陽氣

內陷故脈厥聲嚶咽喉閉塞陰虛發汗又虛其陽  
使陰陽俱虛而戰慄也惡水爲陽虛下之又虛胃  
氣虛寒內甚故裏冷不嗜食陽虛發汗則上焦虛  
燥故口中傷爛舌上白胎而煩燥也經曰脈數不  
解合熱則消穀喜飢至六七日不大便者此有瘀  
血此脈數實不大便六七日熱畜血於內也七日  
之後邪熱漸解迫血下行必便血也便血發汗陰  
陽俱虛故小便利

下利脈大者虛也以其強下之故也設脈浮革因爾  
腸鳴者屬當歸四逆湯主之

脈大爲虛以未應下而下之利因不休也浮者按  
之不足也革者實大而長微弦也浮爲虛革爲寒  
寒虛相搏則腸鳴與當歸四逆湯補虛散寒

辨可下病脈證并治第二十一

大法秋宜下

秋時陽氣下行則邪亦在下故宜下

凡服下藥用湯勝丸中病即止不必盡劑也

湯之爲言蕩也滌蕩腸胃漑灌藏府推陳燥結却熱下寒破散邪疫理導潤澤枯槁悅人皮膚益人血氣水能淨萬物故勝丸散中病即止者如承氣湯證云若一服利而止後服又曰若一服讖語止更莫復服是不盡劑也

下利三部脈皆平按之心下鞭者急下之宜大承氣湯

下利者脈當微厥今反和者此爲內實也下利三部脈平者已爲實而又按之心下鞭者則邪甚也

故宜大承氣湯下之

下利脈遲而滑者內實也利未欲止當下之宜大承氣湯

經曰脈遲者食乾物得之金匱要略曰滑則穀氣實下利脈遲而滑者胃有宿食也脾胃傷食不消水穀是致下利者爲內實若但以溫中厚腸之藥利必不止可與大承湯下去宿食利自止矣

問曰人病有宿食何以別之師曰寸口脈浮而大按之反澁尺中亦微而澁故知有宿食當下之宜大承氣湯

寸以候外尺以候內浮以候表沉以候裏寸口脈浮大者氣實血虛也按之反澁尺中亦微而澁者胃有宿食裏氣不和也與大承氣湯以下宿食

下利不欲食者以有宿食故也當宜下之與大承氣湯

傷食則惡食故不欲食如傷風惡風傷寒惡寒之類也

下利差後至其年月日復發者以病不盡故也當下之宜大承氣湯

乘春則肝先受之乘夏則心先受之乘至陰則脾先受之乘秋則肺先受之假令春時受病氣必傷肝治之難愈邪有不盡者至春時元受月日內外相感邪必復動而痛也下利爲腸胃疾宿積不盡故當下之

下利脈反滑當有所去下之乃愈宜大承氣湯

脈經曰脈滑者爲病食也下利脈滑則內有宿食

故云當有所去與大承氣湯以下宿食

病腹中滿痛者此爲實也當下之宜大承氣湯

金匱要略曰病者腹滿按之不痛爲虛痛爲實可下之腹中滿痛者裏氣壅實也故可下之

傷寒後脈沉沉者內實也下解之宜大柴胡湯

傷寒後爲表已解脈沉爲裏未和與大柴胡湯以下內實經曰傷寒差已後更發熱脈沉實者以下解之

脈雙弦而遲者必心下鞭脈大而緊者陽中有陰也可以下之宜大承氣湯

金匱要略曰脈雙弦者寒也經曰遲爲在藏脈雙弦而遲者陰中伏陽也必心下鞭大則爲陽緊則爲寒脈大而緊者陽中伏陰也與大承氣湯以分

陰陽

釋音

齧

魚結切也

盥

音貫也

悵

上丑亮切也

嚶

於耕切也

漑

音貫也

灌

音貫也

註解傷寒論卷第九





註解傷寒論卷第十

漢張仲景著

晉王叔和撰次

宋成無已註

明汪濟川校正

辨發汗吐下後脈證并治第二十三

此第十卷第二十二篇凡四十八證前三陰三陽篇中悉具載之

卷內音釋上卷已有

此已下諸方於隨卷本證下雖已有緣止以加減言之未甚明白似於覽者檢閱未便今復校勘備列于後

桂枝加葛根湯主之方

葛根 四兩

芍藥 二兩

甘草 二兩

生薑 三兩

大棗 十二枚

桂枝 二兩 去皮

麻黃三兩  
去節

右七味以水一斗先煮麻黃葛根減二升去上沫內諸藥煮取三升去滓溫服一升覆取微似汗不須啜粥餘如桂枝法

桂枝加厚朴杏子湯方

於桂枝湯方內加厚朴二兩杏仁五十箇去皮尖餘依前法

桂枝加附子湯方

於桂枝湯方內加附子一枚炮去皮破八片餘依前法尤附湯方附於此方內去桂枝加白朮四兩依前法

桂枝去芍藥湯方

於桂枝湯方內去芍藥餘依前法

桂枝去芍藥加附子湯方

於桂枝湯方內去芍藥加附子一枚炮去皮破八片餘依前法

桂枝麻黃各半湯方

桂枝

銖一兩十六去皮

芍藥

生薑

切

甘草

炙

麻黃

各一兩去節

大棗

四枚擘

杏仁

二十四箇湯浸去皮尖及兩仁者

右七味以水五升先煮麻黃一二沸去上沫內諸藥煮取一升八合去滓溫服六合

桂枝二麻黃一湯方

桂枝

銖一兩十七去皮

芍藥

六銖

麻黃

十六銖去節

生薑

銖一兩六切

杏仁

十六箇去皮尖

甘草

銖一兩二炙

大棗

五枚擘

右七味以水五升先煮麻黃一二沸去上沫內諸藥  
煮取二升去滓溫服一升日再服

白虎加人參湯方

於白虎湯方內加人參三兩餘依白虎湯法

桂枝去桂加茯苓白朮湯方

於桂枝湯方內去桂枝加茯苓白朮各三兩餘依  
前法煎服小便利則愈

已上九方病證並在第二卷內

葛根加半夏湯方

於葛根湯方內加入半夏半升餘依葛根湯法

桂枝加芍藥生薑人參新加湯方

於第二卷桂枝湯方內更加芍藥生薑各一兩人  
參三兩餘依桂枝湯法服

梔子甘草豉湯方

於梔子豉湯方內加入甘草二兩餘依前法得吐止後服

梔子生薑豉湯方

於梔子豉湯方內加生薑五兩餘依前法得吐止後服

柴胡加芒硝湯方

於小柴胡湯方內加芒硝六兩餘依前法服不解更服

桂枝加桂湯方

於第二卷桂枝湯方內更加桂二兩共五兩餘依前法

已上六方病證並在第三卷內

柴胡桂枝湯方

桂枝 去皮

黃芩

人參 各一兩半

甘草 炙一兩

半夏 二合

芍藥 一兩

大棗 六枚

生薑 半兩

柴胡 四兩

右九味以水七升煮取三升去滓溫服

附子瀉心湯方

大黃 二兩

黃連

黃芩 各一兩

附子 一枚炮去皮破別煮取汁

右四味切三味以麻沸湯二升漬之須臾絞去滓內

附子汁分溫再服

生薑瀉心湯方

生薑 四兩

甘草 三兩

人參 三兩

乾薑 一兩

黃芩 三兩

半夏 半升

黃連 一兩

大棗 十二枚

右八味以水一斗煮取六升去滓再煎取三升溫服一升日三服

甘草瀉心湯方

甘草 四兩

黃芩 三兩

乾薑 三兩

半夏 半升洗

黃連 一兩

大棗 十二枚

右六味以水一斗煮取六升去滓再煎取三升溫服一升日三服

黃芩加半夏生薑湯方

於黃芩湯方內加半夏半升生薑一兩半餘依黃

芩湯法服

已上五方病證並在第四卷內

桂枝加大黃湯方

桂枝

三兩 去皮

大黃

一兩

芍藥

六兩

生薑

三兩 切

甘草

二兩 炙

大棗

十二枚 擘

右六味以水七升煮取三升去滓温服一升日三服

桂枝加芍藥湯方

於第二卷桂枝湯方內更加芍藥三兩隨前共六

兩餘依桂枝湯法

四逆加吳茱萸生薑湯方

當歸

二兩

芍藥

三兩

甘草

二兩 炙

通草

二兩

桂枝

三兩 去皮

細辛

三兩

生薑

半斤 切

大棗

二十五枚 擘

吳茱萸

二斤

右九味以水六升清酒六升和煮取五升去滓温分

五服○一方水酒各四升

已上三方病證並在第六卷內



四逆加人參湯方

於四逆湯方內加人參一兩餘依四逆湯法服

四逆加豬膽汁湯方

於四逆湯方內加入豬膽汁半合餘依前法服如無豬膽以羊膽代之

已上二方病證并在第七卷內

註解傷寒論卷第十